

रवि शाक्य
इखाछै, यल

श्री वज्रवीर



तुंख्योया महाकाल

सम्पादक:-

श्री वद्रीरत्न वज्राचार्य

तुंख्योया महाकाल द्यो चतुर्दशी महात्म्य

संशोधकः—

रच. श्री पं. अमोघवज्र वज्राचार्य

सम्पादकः—

श्री वद्रीरत्न वज्राचार्य

मन्त्रसिद्धि महाबिहार

(येँ, महाबौद्ध, छेँ)

आयोजक एवं प्रकाशकः—

श्री महेन्द्ररत्न वज्राचार्य

मन्त्रसिद्धि महाबिहार

(सबल बहाः, येँ)

प्रथम संस्करण- ने. सं. १०६३ स १०००

द्वितीयसंस्करण- ने. सं. ११०६ स १०००

इच्छा दुपिसं न्ह्याम्हसियां नं थ्व सफू
छापे यानाः पिकाये ज्यू ।

(सर्वाधिकार स्वतन्त्र)

पिथनागु दें:- बु. सं. २५३३
ने. सं. ११०६
बि. सं. २०४६
ई. सं. १९८६

मू:- २/- तका

जिगु निवेदन

झीगु नेपाल देशया धर्म मतावलम्बिपिसं 'बुद्ध शासन रक्षक' धका श्री बज्रवीर महाकाल यात विहार, वहि, ननी, चुक, देवस्थल, सतः पति छेँखा छेँखा पति स्थापना याना तथा पूजा याना वया च्वंगु जुया च्वंच्वम । हानं नेपालया आचार्यपिसं थुम्ह श्री बज्रवीरया शिक्षा दिक्षा कया तन्त्र मन्त्र जन्त्र योग ध्यान समाधि मण्डल व्रत तर्क कया तथा च्वना वया च्वंगु जुया च्वं च्वन ।

श्री महाकाल देव वसपोलया दक्क खँ ला जि स्युगु मखु दुथे फुथे आःथन श्री वज्रवीर महाकालया व्रत धाल सां (चतुर्दशी व्रत) ब तुं ल्योया महाकालया विषय संक्षिप्त जक् च्वयागु जुल । स्युगु द्वंगु मगागु आपालंदयेफु स्वया बिज्याईपि ब दि पिसं क्षमा ते धयागु मन तुना ।

आ थ्व लेखे ज्यु मज्यु स्वया संशोधन याना बिज्या-म्ह पूज्य स्व. गुरु बर श्री. पं. अमोयबज्र बज्राचार्यया चरणे जिगु शिरं सदां प्रणाम दु । वसपोल गुरु झीगु न्ह्योने मदये धुकल । केवल स्मृति जक् बनि ।

थ्व सफु निकीगु प्रकाशने हयेत प्रफु स्वया बिचा याम्ह ब आयोजक एवं प्रकाशक जूम्ह महेन्द्र रत्न यात धन्यवाद । अले थ्व सफु थःगु हे प्रेसे छापे याःम्ह वज्रा-चार्य अध्ययन मण्डलया शिष्य बच्चु मणि वज्राचार्य सहित पपुलर आर्ट प्रिन्टिङ्ग प्रेस परिवार यिन्ते नं धन्यवाद ।

-बद्रीरत्न

श्व सफूया खँ

तुंखयोया महाकाल धंगु सफू थुगु निक्वःगु संस्करण खः । थुगु सफू न्हापांगु ने. सं. १०६३ स पिदंगु खः । आः ११०६ स अर्थात् १७ त्रिन्ट्युदे लिपायागु श्व निक्वःगु संस्करण खः । थुजोगु सफू प्रकाशे ह्येगु मनं तुना फुगु चाःगु ग्वहाली कथं आयोजना याना बिजागु जुल । थुयां न्ह्यो नं श्वहे आयोजनाय् तःदेहया महात्म्य धंगु सफू व तारातीर्थ यागु पिहाँ यये धूकूगु दु । थुगु आयोजनाया स्वंगूगु सफू खः । थुगु सफू यसपोलं देशया थासं थासय् धर्म देशना याना बिज्याइ थेंतुं श्वहे झी सकलसिनं थूगु भाषाय् हया बिज्याःम्ह गुरुवज्राचार्य बद्रिरत्न जु खः । थुगु वज्रबीर महाकाल धालसां बुद्ध शासनया रक्षकजुया बिज्याःम्ह धंगु झीगु धर्मग्रन्थस उल्लेख जुया च्वंगु खः । वहे अनुरूपं झीगु नेपाले नेपाःमिपिनिगु छंखा पतिकं स्थापना याना पूजा आदि याना वयाच्वंगु नं खः । अले तुं ख्योया महाकाल धंम्ह झीहे वज्राचार्य दिनि आजु मन्त्रसिद्धि महाबिहारया शाश्वतवज्र वज्राचार्यजं साधना याना स्थापना याना वंगु धंगु खँ झीसं न्यना हे तयागु खः । थुगु सफू वहे महाकाल यागु बिषयया व्रत धर्म दनेत माःगु धर्मकथा चतुर्दशी महात्म्य धंगु जुल । थुजोगु खँ सकलसिनं सीका तये माःगु हे खँ खः । अले थुगु सफूया मुद्रण सवलगतलीया पपुलर आर्ट प्रिन्टिङ्ग प्रेसे मुद्रण जुया थथे सकल जनसमक्षया न्ह्योने निक्वःगु खुसिइ प्रकाशे वःगु जुल । थुगु पुण्य सम्भारं सकल भक्त जनपिनिगु जयमङ्गल जुइमाः धंगु मनंतुना । अस्तु ।

—महेन्द्ररत्न

श्री

चतुर्दशी व्रत महात्म्य

चतुर्दशी व्रत धालसां महाकाल या
व्रत दनेगु चलन नेपाले न्हापा न्हापां निसें
दुगु जुया चवन ।

श्व व्रत कृष्ण पक्षया चतुर्दशी खुन्हु
चवनिगु जुया चवन । हानं थुगु व्रतया विधान
तथा उद्धार जूगु खँ शाक्यसिंह भगवान्
बुद्ध अग्र श्रावक शारिपुत्र यात कना
बिज्यागु जुया चवन । श्व खँ 'कविता वदान-
या' १५ पञ्चदशोऽध्यायस चवया तःगु खँ
खः । विधान थथे—

सुथ न्हापां तीर्थे वना विधि अनुसारं
मोल्हुया शुद्ध मन याना उपोषध या नियमे
चवना शुद्धगु वस्त्रं पुना सिद्धाश्रम जुया
चवंगु मनोरमगु स्थाने चवना महाकाल या
प्रतिमा दुगु प्रति भराड (पौभा) ब्वया नाना
प्रकारया छत्र ध्वज इलां बाँलाक पेना
संपूर्ण पूजाया ज्वलं सर जाम विधि बमो-
जिम स्थापना याये ।

थनंलि न्हापां गुरु यात लुमंका त्रिरत्न
शरण वनालि बुद्ध शासन रक्षायाना बिज्याना
चवंम्ह श्री महाकाल यागु गण सहित याना
विधान थें मण्डल दय्का (तन्त्रोक्त पञ्चा-
मृत) पुष्प, धूप, दीप, व नैवद्य अलि बलि
(गोजा, पीजा) समेतं युक्त याना हर्ष मानं
श्री महाकालया व्रतयाये । हानं गुम्हसें थ्व
कृष्णपक्ष चतुर्दशी (अर्थात् चह्ले खुन्हु)
उपोषधया नियमे चवना थुगु व्रत यायी
उह्मेसिया सकल शत्रु जिते जुया सकल

राष्ट्रया मालिक जुया चवने दयी ।

थ्व चतुर्दशी व्रतं उद्धार जगु खँ थथे-
परापूर्वकाले वाराणसी धालसां काशी शहरे
ब्रह्मदत्त भयाह्य जुजु जुया चवन । उह्य जुजुं
वाराणसी देशया जवपत्ति च्वंगु शिवालये
(कल्याणगु छेँस) वना महिना पत्तिकं कृष्ण
पक्षया चतुर्दशी खुनु विधि अनुसारं मोल्हुया
उपोषध या नियम कया श्री महाकाल यात
विधि अनुसारं पूजा याना नमस्कार याना
सदा कालं भजन याना व्रत याना चवन ।

थुगु पुण्यं उगु देशे सदा नं बिधन
उपद्रव मदया सुभिक्ष मङ्गल जुया अनेक
सुख भोगं सहित याना पुण्यं हे राज्य
चले याना चवना च्वंगु जुल ।

छन्हु मेगु देश याम्ह जुजुं शैव्यत मुंका
खड्ग, अंकुश, भाला, मुगः, धनुष व परशु
अनेक हातहतियार ज्वना काशी देशे युद्धयाः
वःगु जुल ।

अथे युद्धयाः वःगुलि देश बासित सकल
ग्याना जनतात दक्व मुना मन्त्री सहित
जुजु ब्रम्हदत्त याथाय् वना बिति याःवन ।

हे महाराज ब्रम्ह दत्त ! झीगु देशे पर
चक्रया जुजु वया युद्ध याःवल, उकिं याना
प्रजापिन्त तच्चवतं दुःख जुल । हे महाराज !
आःछु यायेगु आज्ञा जुया बिज्याहुँ ।

अथ खँ न्यना जुजुं आज्ञा जुल- भो
प्रजागणपि संसारे सुख भोग धयागु सदा नं
दैगु मखु पलेहल्य् चवगु लंख थें चंचल जुया
नाश जुया वनिगु ।

अथे जूसां झीगुं देशे परचक्र वया ल्वाः
वल धका छिपि ग्यायेम्वाः जिगु पुण्यया
बलं अपि दक्व भस्म याना छ्वया बीधका
छिमिसं सीकि ।

अथ खँ न्यना मन्त्री व जनता पिसं
धाल- हे महाराज ! छिपिनिगु पुण्यया बल

जिमिसं मस्यूनि । गुजोगु खः ? हे महाराज
छपिनिगु ऋद्धि बल स्वयेगु इच्छा जुल । हे
महाराज ! याकनं कयना पर चक्रयात ख्याना
छ्वयेगु ज्यायाना बिज्याहुँ । लिपा परचक्रं
देश त्याका काय् धुंका हाला च्वनां
छुयाये ? थथे देश वासि प्रजा पिसं बिन्ति
यासेलि ब्रम्हदत्त राजा याकनं हे तीर्थे वना
मोल्हुया उपवासया नियमे च्वना चान्हे हे
शिवालये (कल्याणगु छेँस) वना श्री महा-
काल यात आराधना याना पूजा यात ।

गुगु किसिमं पूजा यात धाःसा जिगू
दिशासं गनंहे मस्वसे इन्द्रिय यात वसेतया
एक चित्त याना केवल महाकाल हे जक
ध्यान याना च्वन ।

थनंलि भगवान् श्री महाकाल भयान-
कगु रुपं अन हे प्रत्यक्ष खने दयेक हे उत्पति
जुया जुजु यात करुणा तथा आज्ञा जुल—
हे महाराज ! छं जिगु ध्यान याना

जित छाये आराधना याना चवता आः छं
इच्छा जूगु वर पवं धका श्री महाकालं जुजु
यात आज्ञा जुल-

थनंलि भगवान श्री महाकाल दर्शन
प्राप्त जुस्येलि ब्रम्हदत्त राजां अष्टाङ्ग
दण्डवत् याना थुगु स्त्रोत्र याःगु जुल ।

ॐ नमः श्री महाकाल ॥

श्री महाकालयात नमस्कार

नमस्ते भगवन्वीर सत्त्वार्थो बरदायकः ।

दुष्टसंग्रामसंहार परचक्रप्रमर्दकः ॥ १ ॥

हे भगवान् बज्रवीर महाकाल सत्त्व
प्राणिपिन्त इच्छा जूगु वर प्रशाद बिया
बिज्यायिह्य, हे दुष्ट संग्राम संहार, रांग्रामे
दुष्ट गणपिन्त संहार याना चवंम्ह, हे वीर
परचक्र शत्रुपिन्त फुका बिज्याइम्ह छल-
पोल यात नमस्कार ॥ १ ॥

नमस्ते कृष्णवर्णाय सुशुद्धिपुलात्मने ।

प्रलायाग्निरिवोद्भास ज्वलत्सर्वाङ्गभीषणे ॥२॥

अत्यन्त शुद्धगु तः धंगु शरीर जुया
हाकुसे च्वंगु वर्ण जुया प्रलय् कालया मी
थें छोगु तेज प्रकाश याना सर्वाङ्ग छोया
च्वंगु थें ग्याना पुसे च्वना च्वम्ह छलपोल
यात नमस्कार ॥ २ ॥

नमस्ते रक्तनेत्राय त्रैलोक्यत्रासकारिणे ।

प्रचण्डवर्तुलाकार विद्युत्तेजप्रकाशिने ॥३॥

ह्याउसे च्वंगु चाक चाक लागु मिखा
जुया स्वंगू लोक यात ख्याना विजुली
समान तेज प्रकाश याना बिज्याम्ह छलपोल
यात नमस्कार ॥ ३ ॥

नमस्ते पिङ्गलकेशाय उर्द्धगोनल वज्रज्वलः ।

संदाधकुतिलाकार कर्कशा स्पर्शधारिणे ॥४॥

मिछोया च्वंगुलि बेबे क्वेक वना च्वंगु
मिथें, सियुगू थः बोया च्वंगु सँ जुया क्वा-
चुगु शरीर धारण याना च्वम्ह छलपोल
यात नमस्कार ॥ ४ ॥

नमस्ते स्पूलगात्राय प्रलम्बितमहोदरः ।

जंघोरुहस्तपादादि खर्वसर्वाङ्गसुन्दर ॥ ५ ॥

हे सर्वाङ्ग सुन्दर हे सुन्दर शरीर
जुया बिज्याम्ह ल्होना मोटागु शरीर जुया
प्वाः तः गोयानं लर्के जुया ल्हा तुती खम्पा
चिहा जुया वागः चागु रूप जुया च्वम्ह
छलपोल यात नमस्कार ॥ ५ ॥

नमस्ते विकटरूपाय महादंष्ट्राकरालिने ।

रुधिरारप्रीताय ज्वलतिजह्व सुभीषणे ॥ ६

ततः पुगु धंवा खने दया ग्याना पुगु
रूप जुया मे चुलु चुलु लुया मांस रक्त
ग्राहारा प्रीति जुया भयंकर मूर्ति जुया

चवंह्य छलपोल यात नमस्कार ॥ ६ ॥

नमस्तेऽशोभ्यशोषाय मुण्डमाला विभूषिणे ।

व्याघ्र चर्म वृताङ्गाय नागमुद्राविभूषिणे ॥७॥

अक्षयोभ्य बुद्ध शिरे तथा मुण्ड माला
नं कवखाया धुंया छेंगुलि जँस हिना नागया
तिसां तिया चवंह्य छलपोल यात
नमस्कार ॥ ७ ॥

नमस्ते विश्वरूपाय सहस्रभुजधारिणे ।

श्मशानमध्यसंस्थाय श्री महाभैरवात्मने ॥८॥

विश्व रूप जुया दोलं दो ल्हा दया
श्मशान या दथ्वी चबना महा भैरवया रूप
धारण याना विज्याना चवंह्य छलपोल
यात नमस्कार ॥ ८ ॥

थुलि स्तोत्र याना जुजुं महाकाल यात
विन्ति यात- हे महाकाल बज्र वीर वीराधि
पति, जि संग्राम वने तेना उकिं जित अष्ट-

सिद्धि धयागु च्याता सिद्धि वर बिया
शत्रुयात जिते याये फयेका बिज्याये माल
धका जुजुं प्रार्थना याःगु जुल ।

थुलि जुजुं प्रार्थना याःगु न्यना श्री
बज्रवीर महाकालं ब्रह्मदत्त जुजुयात
अष्टसिद्धि वर प्रशद बिया बिज्यात ।

अष्टसिद्धि छुछु धासा सिद्धांजन १
गुटिका २ पादुका ३ सिद्धदौषधि ४ मन्त्र
५ मणि ६ वश्य ७ राज्य ८ थ्वते अष्ट-
सिद्धि छन्त दत्त धका ब्रह्मदत्त जुजु यात
वर बिया श्री महाकाल अन्तर धान जुया
बिज्यात ।

थुजोगु शत्रु पिनि मिखां
मखनीगु अञ्जन सिद्धि १

शरीर बल्लाना शस्त्र अस्त्रं

थो मफेगु गुटिका सिद्धि २

आकाश मार्ग बोया वने

फेगु पादुका सिद्धि ३

रोग मदया आपालं आयु
दयिगु सिद्धौषधि सिद्धि ४

गबलें हे फुना मवनीगु सम्पति
दयिगु मणि सिद्धि ५

थमं धावव ज्या सिद्धि याये
फयिगु मन्त्रसिद्धि ६

सकल शत्रुत थःगु बसे तथे
फयिगु वश्यसिद्धि ७

सदानं आनन्द पूर्वक राज चलेयाना
चवने फयिगु राज्य सिद्धि ८

थुजोगु दुर्लभगु अष्टसिद्धि वर लाना
स्वयम् थः याकःचा हे ब्रह्मदत्त जुजुं जव-
ल्हा थें ब्वेका सिंह थें धस्वाना संग्राम यावं
बले विपक्षत सकलें ग्याना ब्रम्हदत्त जुजुया
शरणे वःगु जुल ।

थुलि तकं शत्रुपात संहार यायेगुलि
प्रभावकारी जुया बिज्याना च्वम्ह श्री बज्र

वीर महाकाल बिशेषं बुद्ध शासन यातनं
रक्षायाना बिज्याना च्वंम्ह थ्वस्पोल श्री
महाकाल धका सकल सिनं सीका सदानं
भजना याये माल ।

थुगु प्रकारं हे शारिपुत्र ! ब्रम्हदत्त
राजानं चतुर्दशी व्रत धालसां महाकाल या
व्रत दना थः याकचां हे आपालं शैन्यत
मुंका लडाई याःवम्ह पर चक्र या राजा
यात त्याका थःगु वशे तथा ताकाल तकं
आनन्दं वाराणसी शहरे राज्य चले याना
वन धका श्री भगवान् संम्यक् सम्बुद्धं
शारिपुत्र यात कना बिज्याःगु जुल ।

अथेया कारणे गुम्हसिनं थ्व चतुर्दशी
व्रत दना महाकाल या भजन यायी उम्हया
शत्रु भय मदया सकल कार्य सिध्द जुयी ।

॥ इति चतुर्दशी व्रत महारम्य समाप्त ॥



श्री

तुंख्योया महाकालद्यो

मन्त्र सिद्धि महाबिहार धालसां थौं
कन्हें (सवल बहा) धैगु विहारे शाश्वत
बज्र नां जुया च्वंम्ह वज्राचार्य छम्ह दुगु
जुया च्वंच्वन । उम्ह शाश्वत वज्रया
छन्हुया दिने न्हिने निभाले च्वना चिकनं
बुया च्वंगु जुल ।

अवले हे स्वर्गतै तःधिगु (भराये)
पागु सुपाँय् छधी वया निभाद्यो यात क्यू
वल । अले निभाले च्वना चिकनं बुया
च्वंम्ह शाश्वत वज्रयात निभालं मखल ।

वं थ्व छुकिं निभाद्यो कित धका स्वर्गते
थस्वया स्वःवले भाराय् पागु हाकुसे च्वंगु
सुपाँचं निभाद्यो किना च्वंगु खन । अले
व सुपाँय् यात स्वयाहे च्वन सुपाँय् चिला
हे मवं ।

अले चिकं बुया च्वंम्ह दिना शाश्वत
वज्र वज्राचार्य थ्व छु धैगु सुपाँय् धका
ध्याने च्वना स्वया सुपाँय् यात कुतुकेगु
बिचाःयाना शाश्वतवज्र बिहारं पिहाँ
वया सरा सर आगंचपा धालसां तुं
ख्योले वन ।

अनंलि आगं चपाते च्वना सुपाँय् यात
कुतके धका शाश्वत वज्र वज्राचार्य योगे
च्वना बिज्यात । 'आगं चपा' धयागु तुं
ख्यो खः ।

तुं ख्यो धका छाय् धागु धाःसा न्हापा
न्हापा तुं ख्यो द्वंबो जाया सिमात आपाहे

दया च्वंगु हानं व ख्योले लः लुया द्वाच्या
द्वाच्यां तुना च्वंगुलिं तुंगु ख्यो धालसां
[तुं ख्यो] धाःगु खत ।

वहे ख्योले च्वना शाश्वत बज्र निभा-
द्यो यात किनां च्वंगु सुपांय् यात मन्त्रया
बलं साला कुतु कल व सुपांय् यात कुतु
कूगु थाय् थौ कन्हे 'हाकुपात' धयागु
स्थान जुल वथाय् थौ कन्हे तुकु वा खुसीया
वारी पाखे जुया च्वन ।

अले शाश्वतवज्रं सुपांय् कुतु वंगु
थाय्स वना स्वः वन । अन सुपांय्या दुने
च्वंह्य श्री वजूवीर महाकालं शाश्वत बज्र
यात दर्शन बिया बिज्यात ।

उगु सुपांय्या दुने च्वना बिज्याःह्य
महाकाल वजूवीर काशी बिज्याय्त
बिज्याःह्य जुया च्वन ।

हानं अनहे च्वना शाश्वतबज्रं सुपांय्

चवं बिज्याःम्ह बजूवीर महाकाल, यागु
ध्यान पूर्णगु 'पञ्च कपाल' धैगु चर्या गीत
चिना उगु गीत याना पूजा भाव याःगु
जुल ।

(थुगु पञ्च कपाल धैगु चर्या गीत
धालसां (चचा) थौया अद्यापि मन्त्र
सिद्धि महाबिहार या बजाचार्यपिसं हाला
वया हे च्वंगु दनि ।)

थुलि पूजा भाव याय् धुसेलि शाश्वत-
बजू यात वरं प्रसाद बिया श्री बजूवीर
महाकाल आकाशं तुं बिज्याःगु जुल ।

अनंलिपा कलिगत ३८२२ बर्षे सुपाय्
चवं च्वना बिज्याःम्ह बजूवीर महाकालया
ध्यान स्वरूप लोहें याम्ह महाकाल दयेका
शाश्वतबजू बजाचार्य स्थापना याःगु जुल ।
उह्य महाकाल थौया अद्यपि तुं ख्यो सिथे
विद्यमान् जुया च्वंगु दहे दनि ।

वंशावली

थुम्ह शाश्वतब्रज् स्थापना याना तःम्ह
तुं ख्यो सिथय् च्वंम्ह महाकालया ने. सं.
८७६ साले दिलागाक नवमी खुन्हु द्यो
अन्याबले महाकाल द्योया पाली कुतुं
वल ॥ १ ॥

ने. सं. ९६१ साल माघया त्रयोदशी
खुन्हु महाकाल द्योया न्हापा यागु तियेकेगु
हार सेना लिपातस हार ल्होना (भिनका)
तिकूगु दिन ॥ २ ॥

ने. सं. ९७४ श्रावण शुक्ल सप्तमी
मङ्गलबार थुखुन्हु सुथया छगू पहरास
महाकाल द्योया चःति वल मिखा निपां ख्व-
बि हाया वल लोर्किपि स्वः वन ॥ ३ ॥

ने. सं. ९७६ साल भाद्र व शुक्ल
पञ्चमी विशाखा नक्षत्र वैधृत योग
आदित्यवार थ्व खुन्हु तुं ख्यो (आगंचपा)
पिया तव धनका हःगु दिन ॥ ४ ॥

ने. सं ६८१ साल मार्ग शीर्ष कृष्ण
त्रयोदशी थुखुन्हु तुं ल्योले च्वपि नारायण
द्यो १ चिभा द्यो २ समुद्यो ३ तापा इनाय्
द्यो ४ थ्व ते प्यम्ह द्यो तुं ल्यो कोठ बेलस
निना क्वकाल ॥ ५ ॥

तुं ल्यो लं क्वकार्पि प्यम्ह द्यो महा-
काल द्योया देगःया क्वये जव अंगले नारा-
यण द्यो तया बिल खव पाखे अंगले समुद्यो
तया बिल ॥ ६ ॥

तापा इनाय् द्यो धालसां (गणेद्यो)
महाकाल द्योया देवगले दुने द्योया देपा
पाखे तया तल ॥ ७ ॥

चिभाद्यो जक क्वय् तया विल
जुल ॥ ८ ॥

तुं ल्यो या महाकालया खं
संक्षिप्त मात्रं क्वचाल ।



सफू दैगु थाय्:-

- १) श्री वद्वीरत्न वज्राचार्य, महाबौद्ध, येँ ।
- २) श्री महेन्द्ररत्न वज्राचार्य, सबल वहाः, येँ ।
- ३) श्री वज्राचार्य अध्ययन मण्डल, येँ ।
- ४) श्री पपुलर आर्ट प्रिन्टिङ्ग प्रेस, सबल गल्लि ।
- ५) श्री मन्त्रसिद्धि ग्रन्थालय, मन्त्रसिद्धि महाबिहार ।



छगूया मू:- २/- तका जक

कलिगत वर्ष:- ५०६०